

LAMENTU DI UN PICCIRIDDU MAI NASCIUTU

Avia a piacìri nàsciri a lu munnu
E vèniri a la luci anchi chiancennu.
Chiddi paraggi a mia già nati sunnu,
Me' matri 'un appi nè cori nè sennu?
Cuvava comu un focu la me' vita,
Ma, pi cu rissi no, fu po' abortita.

Avia a piacìri essiri vattiatu
E comu tutti jri a la duttrina.
E ogni 'stanti taliari lu criatu
E ringraziari a Diu ogni matina.
E libirari ogni sintimentu
Ed essiri di Cristu in Sacramentu.

Avia a piacìri essiri annacatu,
Manciarimi lu latti e li viscotta.
'Nta la girella, a 'stu latu e a 'ddu latu,
Firriari e po' cariri a 'na botta.
E viriri a me' matri chi currissi
E mi jssassi e a lu pettu mi strincissi.

Avia a piacìri jri ni l'asilu
E 'nsignarimi a fari li barretti.
Aviri un capputeddu russupilu,
E li piruzzi cu scarpi e quasetti,
E po' yri a la scola elementari,
Pi l'italianu scriviri e parrari.

Avia a piacìri essiri Giuvanni
E di l'amici essiri pinsatu.
E passari li jorna e misi ed anni,
Luttannu tra la grazia e lu piccatu.
Avia a piacìri gödiri e suffrirri,
E diri: "Sugnu ccà", pi po' muriri.

O farsa matri, di natura chiusa
Ed accicata di la suciità
E di la stampa, chi tantu cunfusa
Scancia minzogni pi la virità,
Picchè nun attintasti a mia affrittù
E mi ricisti: “No, tu statti zittu”?

O matri, figghia di la “maggjuranza”,
Picchè nun attintasti la cuscienza?
Addivintau ’na tomba la to’ panza
E no la culla di la to’ pacenza.
Tu “Bon Natali” va rici a li genti,
E pi mia ’un vali, poviru ’nnuzzenti!

L'OMU E LA SCENZA

Ormai è risaputu a tutti quanti
Chi la scenza fa mraculi putenti.
Duttura e scinziati ci n'è tanti,
Tutti sturianti e di testa eccilenti.
Ammentanu li cosi cchiù allittanti,
Di difficili ormai nun c'è cchiù nenti.
L'omu cu la so' scenza fa prugressu
Ma si cunnanna a li voti iddu stessu.

Sintiti soccu dissì la Tivvù:
Riguardu a cu' è chi voli lu bebbè,
Problemi pi tu avilli 'un ci n'è cchiù,
Si lu vo' biunnu, scuru o com'erè.
Cu nasu a patatedda e l'occhi blu
Li stampantu a misura (e veru è).
Ormai è tuttu computirizzatu:
'Nzoccu tu voi, tu veni accountintatu.

Omù chi ti cunsidiri patruni,
Svulazzi 'ncelu e nuddu ti tratteni.
Acchiappi stiddi ma nun ti n'adduni,
Chi cerchi tuttu, tranni lu to' beni,
Si cu la scenza vo' fari fiuruni,
'Nfavuri all'omu mèttila cummeni.
Mèttiti comu li Tri Re a la via,
Cussì la scenza è 'n'atra epifania.

RIFLISsIONI DI UN VICCHIAREDDU SULU

Ricordu quannu chi avia durici anni,
Satava un metru e vinti a perì 'nguitti.
Sugnu ora tuttu chinu di malanni
E li perì aiu chini di gran fitti.
Ma nun chianciu chi 'un pozzu caminari,
Chianciu chi nuddu mi veni a truvari.

Ricordu quannu fici vintun'anni.
Lu cori me' si 'nnamurà di Rosa.
Si 'nchianavanu puru li muntagni
E cu l'amuri supirai ogni cosa.
Ma ora forza cchiù nun n'aiu nenti.
M'hann'a ammuttari, chi sugnu 'mpotenti.

Ricordu chi po' vinniru li figghi:
Aspanu, Pippineddu e Catarina.
Ci retti vita e ci retti cunsigghi,
Pi criscili avarava ogni matina.
Ora su' a je' pi mia e tu pi tia.
E nuddu cchiù mi scontra o mi talia.

A li figghi ci fici casa e terra,
A la figghia mobbilia e biancaria.
E pi 'mmiria si sviluppà na guerra,
E assicutaru fora puru a mia.
Nta sta casa ora fu' ricoveratu
E sugnu 'ncumpagnia, ma scumpagnatu.

Lu suli affaccia, trascurri lu ventu,
Ma la jurnata nun mi passa ma'.
Pensu e rifrettu, sì, nta ogni mumentu:
Pi mia la vita ora cchiù nenti va.
Mi vannu l'occhi a la cruci di Cristu.
Nasci la spranza: e campu anchि pi chistu.

A CERTI PRUPAGANDISTI

Va cu valigia, vistitu e cravatta,
Tuppulia arantu arantu ad ogni porta.
Di un prupagandista è chi si tratta,
Chi mai di firriari si cunorta.
Sfirria lu riscrusu s'un ci appatta,
Dunni ch'è priparatu, iddu ti porta.
Ti rici chi la Bibbia stissa è fatta.
'Mmeci vi ricu jè chi l'hannu torta.

Ti rici chi lu munnu è quasi lestu,
Cu' è ch'un si cummerti, 'un trova postu.
Ti raccumanna puru a fari prestu,
E di siguirsi a iddu a ogni costu.
Si senti sulu iddu lu maestru,
Cu lu versettu a crozza fa lu tostu.
A monaci e parrini runa 'nguestu.
Lu Paraddisu (dici) è sulu nostru.

Ci rissi: "Lu Signuri Onnipotenti
Si fici omu, comu tanti e tanti.
Picchè vui l'apprizzati picca e nenti,
Ch'un criritti a li Santi di li Santi?
Arrifriscàtivi anticchia la menti;
Gesuzzu è veru Diu, lu Rignanti.
Lu Cristu ni la Chiesa voli genti
Piccatura, e po' iddu ni fa santi".

LU VIDDANU ARCAMISI

Lu viddanu arcamisi va 'ncampagna,
Cuntenti zappa e conza la so' vigna.
Lenta a lu 'mmernu, quannu chi si vagna
La bunaca, li cavusi o la tigna.
Iddu curtiva chianura e muntagna,
Puta, alliazza e tira li so' ligna.
E pi sapiri quant'è chi guaragna,
Nun viri l'ura chi c'è la vinnigna.

Di pria matina 'nsina a ch'è la sira,
Accarizza e trasforma la natura.
'Ncapu un tratturi s'assetta e s'ammira,
Iddu dda vigna la pasci e lavura.
Quannu po' sbuccia nt'aprili, suspira:
Ddu sciafurru lu cori so' spittura.
S'assetta stancu 'nkapu di na mira:
"Diu, aiutani (dici) sta criatura!"

O granni Diu santissimu e putenti,
Tu chi criasti stiddi, mari e munti,
Tu chi ccà, nta lu vinu, ti presenti
E cu lu pani to' vinemu assunti,
Allùmina a pulitici la menti,
Chi vonnu fari vinu e boni cunti.
Zuccaru e acqua, ma racina nenti:
C'è la liggi, ma semu tutti junti.

LU NUVARARU

Lu nuvararu parti a la matina,
Pi fari fari a la terra miluna.
Armatu di zappuna e tratturina,
Curtiva cuti, crita e zabbuluna.
Si sbrazza, e cala e jsa la carina,
Travagghia cu lu suli e cu la luna,
Purceddi e purcidduni iddu simina
Cull'acqua, ni li sciacchi, a una a una.

La so' famigghia parti prestu e allura,
Cu bagneri, quartari e cazzalora.
Ma l'acqua va asciucannu anzi chi scura,
E mancu abbasta echiù la socalora.
O Diu, siddu chiuvissi anchि pi un'ura,
O si vinissi un timpurali ora,
Sparagnassimu, sì, tanti surura:
Simenza avvarvulata, prestu fora.

Ma nta lu celu lu suli è 'nfucatu
A lu Quasali ed a lu Firricinu.
Lu nuvararu, di comu è accarpatu,
Nt'Aprili pari comu un tunisinu.
Ma nun s'arrenni, mancu si è attaccatu
Di 'n avutru nimicu, chi è vicinu.
Lu vermi: ma chi armalu sciliratu!
Si mancia la nuvara e fa stirminu.

Dda nuvaredda iddu la ciatia,
La 'nzilestra, lavura e sempri spera.
Si c'è 'na sciacca ch'è nnarrè di via,
La zappa, l'abbivira e la 'nfumera.
E quannu po' nt'Austu la talia,
A ura di sinzali si dispera.
E lu napulitanu, chi marpìa,
Ci scippa li miluna a leta cera.

LU VIDDANU E LU PICURARU

Chidda tra li viddani e picurara
È la storia vecchia comu nostra terra.
E la paci ntra d'iddi ha statu rara:
Lu Cainu cu Abeli già fu 'nguerra.
La lotta sempri ha statu dura e amara.
Ancora c'è cu' s'azzuffa e s'afferra.
Li picurari contru li viddani
Sunnu comu li 'atti cu li cani.

Successi na duminica matina.
Fu 'nta na vigna a la Serra Campana.
Lu viddanu sintiti chi cumina:
Stancu e stuffu di tutta la simana,
Pi dannu fattu 'nta la so' racina,
Darrè 'na macchia si 'mposta e si 'ntana.
E taliannu a destra ed a manca
Aspetta chi arrivà la frotta bianca.

Lu picuraru, ch'è furbu di menti,
Duminica camina latitanti.
E penza: "Lu viddanu, giustamenti,
Va a la missa, a priari a li so' santi.
Ammentri chi iddu prea tuttu cuntenti,
Saziu st'armali, 'un sunnu cchiù lattanti'.
E mentri chi friscava lu liu llà!
Lu viddanu ci dici: "Dunni va'?"

Ci dici: "Cu' ti porta a gghiri ccà?
Patruni di sta vigna sugnu jè!
Racina n'avì assà, ma si 'un si fa,
A la vinnigna lu guadagnu 'unn'è?
Tu sì senza cuscenza e umanità.
Di ccà vattinni e 'un ci turnari arrè!"
'Nta mentri lu viddanu l'accusava,
Lu pasturi risposta priparava.

“Caru ’zu Brasi (e ci va pi davanti),
 Si carmassi chi ’un ha successu nenti.
 Li pecuri, sapiti, su’ ’gnuranti
 E la cchiù sperta mi duna gran stenti.
 Forsi ha successu chi a panza vacanti
 Manciaru pi sliarisi la menti”.
 Lu viddanu, sintennu stu parrari,
 Persi la testa e si misi a girarai:

“Un ha successu nenti, e m’è carmari!
 Cu quali cori tu chissu po’ diri?
 Allura ti vo’ propriu ruvinari?
 Tu chi ni sa’ si vonnu dimagriri?
 Siddu a panza vacanti ’un ponnu stari,
 Tu ti li vinni. E di ccà ti n’ha’ a gghiri!
 Prima, ’nta la staciuni e poi a lu ’mmernu,
 Ssi pecuri pi mia sunnu lu ’nfernul!”

Sintennu sti paroli, lu pasturi
 Rici: “Zu Brasi, si fici strameri,
 Vegna dumani, quannu ch’è l’arburi.
 Ricotta c’è pi vui, tumazzu e seri.
 Ma nun m’amminazzati, pi favuri,
 Li pecuri nnuccenti su’ sinceri”.
 Ma lu zu Brasi cumencia a quariari
 E ci arrispunni: ‘Mi vo’ ricattari?

Jè sulu sacciu la gran fatiata
 Ch’è fari a marzu pi lu frisiari.
 La terra pari ’ncarcata a balata,
 E ’un c’è zappetti chi ponnu abbastari.
 Lu tratturinu m’abballa e mi sata,
 Li me’ vrazzudda mi sentu ammuddari.
 E si nun mi capisci, sa’ ch’ha’ a fari?
 Cancia misteri e m’aiuti a zappari!”

LA FARSA DI LA SARSA

Ni partemu a li quatru di matina,
E fu un jornu di 'mmenzu la simana.
Arrivati chi c'era l'acquazzina,
Lu 'riddu ni cantava a vuci sana.

Me' soru rissi: "E chista è matinata".
Me' matri arrispunnlu cota cota:
"Priparamu la prima quararata".
E partemu pi ligna a la ricota.

Ammentri li me' occhi si pusaru
A un carrateddu di darrè lu muru.
Sintìa comu un rumuri di visparu
Ma api 'un ni virìa, ch'era scuru.

Chiddu era un carrateddu abbannunatu,
Picchì a postu di vinu facia acìtu.
All'api ci piaciù all'aduratu,
E ci ieru a stari, senza mancu 'mmitu.

Me' soru rissi: "Semu ruvinati!
Appena quarìa l'aria cu' ssi vespi,
Pi minimu vinemu muzzicati,
S'un si partinu puru pi li testi!"

'Un allistìu mancu di parrari
Chi 'n'apa nta lu labbru la punciu.
"Sta jurnata sta sarsa 'un si pò fari!"
Ma "Curaggiu!" (me' patri arrispunnlu).

"Ora pi ss'api ccà ci penzu iu,
Ci mettu un tappu e prestu la finemu!"
Lu tappu cu lu scuru nun trasìu.
Me' cugnatu: "Picciò, 'un ni cunfunnemu!"

Intantu l'api già si tramazzaru,
 E forsi si riuneru e dicireru.
 La riggina ci retti ordini amaru,
 Pi farini scantari pi ddiveru.

Difatti l'api parteru 'npicchiata
 Pi l'aricchi e lu nasu, e pi li perì.
 E nuatri, capennu la varchiata,
 Curremmu, senza vîrirî, nnarreri.

Ci foru chiddi chi appiru diarrìa
 E cu li manu parianu 'nfilici.
 Mentr'je' curria, cchiù forti di Gulìa,
 Nun virìa nè muntati, nè galici.

Doppu quarchi menz'ura di battagghia,
 Me' patri scuncruri ddu ribbeddu.
 Cu un fasciu di ristuccia e unu di pagghia,
 Ci retti focu a ddu gran carrateddu.

O matri matri, chi 'un l'avissi fattu!
 Dd'api parteru abbersu li saitti.
 E lu cchiù spertu facia comu un mattu,
 Accuminciannu a sèntiri li fitti.

“Aspà, ma ch'addumasti n'atru 'nfernû?”
 L'api partianu tutti pi li facci.
 Ogni tuccata era un bucu di pernu
 O un pirtusiddhu pi mettiri tacci.

Ammentri vintiaru a me' figghiozzu,
 Chi si ja quartiannu a li latati.
 “Ora li affucu pi lu cannarozzu,
 (Mi rissi) o armenu li pigghiu a pitrati.”

Lu cchiù scantatu era me' cugnatu,
 E si 'nfilà dintra lu “leoncînu”.
 Dicìa: “Su' càvuri senza ch'ha agghiurnatu,
 Penza cchiù tardu, quann'è jornu chinu!”

Me' patri rava sempri lu curaggiu,
 Dicennu: “Ni finìu a pani e pruna!”

Cu l'ammuniaca e li cutedda 'ntagghiu,
Ni curammu li bozza e l'ammaccuna.

La carma, doppu un pezzu, arriturnau
Picchì dd'apuzzi si stancaru puru.
Lu pumaroru prestu si squarau,
E allistemu la sarsa cu lu scuru.

Ogni vota chi manciu pasta e sucu,
Ricordu ddu visparu e penzu e dicu:
“Ch'è duci! Ch'è squisitu! Ch'è succusu!
Avogghia si sturcemmu lu viddicu!”